



Republika e Kosovës
Republika Kosova-Republic of Kosovo
Qeveria - Vlada - Government
Ministria e Administrimit të Pushtetit Lokal
Ministarstvo Administracije Lokalne Samouprave
Ministry of Local Government Administration

039-242

12.03.2009

Prishtinë,
Datë: 11 mars 2009

Për: Kryetarët e Komunave të Republikës së Kosovës

Lënda: Udhëzimi Administrativ 2009/1

Të nderuar Kryetar,

Duke u bazuar në mandatin e saj ligjor të përcaktuar me Rregulloren 2005/15 dhe Rregulloren 2007/18 për ndryshimin e Rregullores 2001/19 Mbi Degën e Ekzekutivit të IPVQ-ve si dhe nenin 41 të Ligjit për Vetëqeverisje Lokale, Ministria e Administrimit të Pushtetit Lokal me qëllim të përmbushjes së përgjegjësisë të saj në raport me komunat ka hartuar Udhëzimin Administrativ 2009/1 Për Procedurën e Zgjedhjes dhe Përgjegjësitë e Kryesuesit të Kuvendit të Komunës.

Ky Udhëzim Administrativ ka për qëllim të rregullojë procedurën e përzgjedhjes së Kryesuesit të Kuvendit të Komunës nga radhët e anëtarëve të Kuvendit të Komunës 30 ditë pas konstituimit të Kuvendit të Komunës, të drejtën e subjekteve politike, nismës së qytetarëve dhe kandidatëve të pavarur për të propozuar ndonjë anëtar nga radhët e Kuvendit të Komunës për t'u zgjedhur Kryesues i Kuvendit.

Në bazë të këtij Udhëzimi Administrativ mandati i Kryesuesit të Kuvendit të Komunës është i njëjtë me mandatin e anëtarëve të Kuvendit të Komunës.

Përgjegjës për zbatimin e këtij është Kuvendi i Komunës dhe Kryetari i Komunës, ndërsa monitorimin e zbatimit e bënë Ministria e Administrimit të Pushtetit Lokal.

Bashkangjitur gjeni Udhëzimin Administrativ 2009/1 Për Procedurën e Zgjedhjes dhe Përgjegjësitë e Kryesuesit të Kuvendit të Komunës.

Me respekt,

Besnik Osmani,
Sekretar i Përhershëm - MAPL

Kopje: Kryesuesit e Kuvendit të Komunës
Arkivit të MAPL-së



Republika e Kosovës
Republika Kosova-Republic of Kosovo
Qeveria -Vlada- Government

*Ministria e Administrimit të Pushtetit Lokal
Ministarstvo Administracije Lokalne Samouprave
Ministry of Local Government Administration*

Në pajtim me nenin 1.3 pika (d) dhe nenin 1.6 të Rregullores 2001/19 Mbi Degën e Ekzekutivit të Institucioneve të Përkohshme të Vetëqeverisjes në Kosovë, nenin 41 të Ligjit mbi Vetëqeverisjen Lokale, Rregulloren e UNMIK-ut 2005/15, si dhe Rregulloren 2007/18 për ndryshimin e Rregullores 2001/19 Mbi Degën e Ekzekutivit të IPVQ-ve, Ministri i Ministrisë së Administrimit të Pushtetit Lokal, nxjerr këtë:

**UDHËZIM ADMINISTRATIV NR. 2009/01
"PËR PROCEDURËN E ZGJEDHJES DHE PËRGJEGJËSITË E KRYESUESIT
TË KUVENDIT TË KOMUNËS"**

**Neni 1
Qëllimi**

Ky Udhëzim Administrativ ka për qëllim rregullimin e procedurës së zgjedhjes dhe përgjegjësitë e Kryesuesit të Kuvendit të Komunës.

**Neni 2
Procedura për zgjedhjen e Kryesuesit të Kuvendit të Komunës**

1. Kuvendi i Komunës më së largu 30 ditë pas konstituimit zgjedh Kryesuesin e Kuvendit të Komunës nga radhët e anëtarëve të Kuvendit të Komunës.

2. Secili subjekt politik, nismë qytetarësh apo kandidat i pavarur i përfaqësuar në Kuvendin e Komunës ka të drejtë që nga radhët e anëtarëve të Kuvendit të Komunës të propozoj një anëtarë për Kryesues të Kuvendit të Komunës.

3. Kuvendi i Komunës më shumicën e thjeshtë të anëtarëve të Kuvendit të Komunës formon Komisionin për mbarëvajtjen e procesit të votimit, i cili përbëhet nga 3 deri 5 anëtarë të Kuvendit të Komunës.

4. Komisioni për votim është përgjegjës që të numëroj votat dhe t'i komunikoj rezultatet e votimit para anëtarëve të Kuvendit të Komunës.

Neni 3

Votimi dhe zgjedhja e Kryesuesit

1. Votimi për zgjedhjen e Kryesuesit të Kuvendit të Komunës bëhet me vota të fshehta.

2. Për t'u zgjedhur në votimin e parë kandidati i propozuar për Kryesues të Kuvendit të Komunës duhet të marrë më shumë se gjysmën e votave të numrit të përgjithshëm të anëtarëve të Kuvendit të Komunës.

3. Nëse pas votimi të parë asnjëri nga kandidatët e propozuar për kryesues të Kuvendit të Komunës nuk merr më shumë se gjysmën e votave të numrit të përgjithshëm të anëtarëve të Kuvendit të Komunës, atëherë dy kandidatët të cilët kanë fituar numrin më të madh të votave shkojnë në votimin e dytë. Kandidati që merr më shumë se gjysmën e votave të numrit të përgjithshëm të anëtarëve të Kuvendit të Komunës në rundin e dytë zgjedhet Kryesues i Kuvendit të Komunës.

4. Nëse edhe pas votimit të dytë asnjëri nga kandidatët nuk ka fituar shumicën e kërkuar si në pikën 3 të këtij Udhëzimi atëherë shkohet në votimin e tretë. Në votimin e tretë kryesues i Kuvendit të Komunës zgjedhet kandidati, i cili merr më shumë se gjysmën e votave të anëtarëve të pranishëm dhe që votojnë, për propozimin në mbledhjen e Kuvendit të Komunës.

5. Nëse edhe pas votimit të tretë nuk zgjedhet Kryesuesi i Kuvendit të Komunës, atëherë i tërë procesi për zgjedhjen e kryesuesit të Kuvendit të Komunës përsëritet.

Neni 4

Mandati

Mandati i Kryesuesit të Kuvendit të Komunës është i njëjtë me mandatin e anëtarëve të Kuvendit të Komunës.

Neni 5

Kryesuesi i Kuvendit të Komunës

1. Kryesuesi i Kuvendit të Komunës dhe Kryetari i Komunës caktojnë rendin e ditës për mbledhjet e Kuvendit të Komunës.
2. Kryesuesi i Kuvendit të Komunës i thërret dhe kryeson mbledhjet e rregullta dhe të jashtëzakonshme të Kuvendit të Komunës dhe Komitetit për Politikë dhe Financa.
3. Kryesuesi i Kuvendit të Komunës njofton Komisionin Qendror Zgjedhor për vendin e lirë të ndonjë anëtarit të Kuvendit të Komunës që pushon të jetë anëtar, ashtu siç parashihet në nenin 37 të Ligjit për Vetëqeverisje Lokale.
4. Kryesuesi i Kuvendit të Komunës nënshkruan të gjitha aktet e miratuara nga Kuvendi i Komunës.
5. Kryesuesi i Kuvendit të Komunës pas nënshkrimit të akteve të miratuara në Kuvendin e Komunës një kopje të aktit të nënshkruar ia dorëzon Kryetarit të Komunës.
6. Kryesuesit të Kuvendit të Komunës për ushtrimin e këtyre kompetencave i nevojiten resurse njerëzore dhe materiale të cilat sigurohen nga ekzekutivi i Komunës.

Neni 6

Përgjegjësinë e zbatimit

Kuvendi i Komunës, Kryesuesi i Kuvendit dhe Kryetari i Komunës janë përgjegjës për zbatimin e këtij Udhëzimi Administrativ.

Neni 7

Monitorimin i zbatimit

Ministria e Administrimit të Pushtetit Lokal, do të monitorojë zbatimin e këtij Udhëzimi Administrativ.

Neni 8

Hyrja në fuqi

Ky Udhëzim Administrativ hyn në fuqi ditën e nënshkrimit nga Ministri i Ministrisë së Administrimit të Pushtetit Lokal.

Prishtinë, 26 shkurt 2009

Sadri Ferati

Ministër i Ministrisë së Administrimit të Pushtetit Lokal
